

國朝常州駢體文錄

國朝常州駢體文錄卷弟二十八目

楓南山館文六首

陽湖莊受祺衛生

湖北巡撫贈總督胡文忠公益陽專祠碑銘

天寧寺重建禪堂記

瀛寰志略敘

代

移華館集後敘

族祖子定先生誄

侍姬柳氏墳志

能懼思齋文四首

武進莊士敏仙求

福建行省重濬城河碑記

代

重建杭州海神廟碑銘

并敘代

移華圖贊

格陰日課敘

國朝常州駢體文錄卷第二十八目

國朝常州駢體文錄卷第二十八

楓南山館文

陽湖莊受祺衛生

湖北巡撫贈總督胡文忠益陽專祠碑銘

太子太保湖北巡撫贈總督胡文忠之喪既歸益陽有

詔就其地創立專祠與湖北武昌府專祠並建其次歲總督官公令知州王墉度地於邑城西門外學宮之旁鳩工庀材輪奐攸崇棖桷楹楣如禮割牲滌器之所皆具十月落成當事屬受祺爲文受祺昔宦湖北從公最久適僑居益陽得與豆簋之役其曷敢辭謹按公諱林翼字潤芝湖南益陽縣人也秉通敏之資成肫摯之行世載清德蚤聞聖道年二十五以進士入翰林紬金匱之書陋咫聞之學持衡校士時稱得人逾十年出守貴州安順思南黎平各

郡邊徼荒陬姦宄肆伏禽渠殲賊數郡一清會粵凶煽虐
毒流江渚大吏疏請公往未至賊已長驅四入大帥告實
妖氛所指埽及湖湘公反戈南援協謀埽盪旋以陳臬鄂
都率師東返會楚軍再振再蹶烽焰彌熾公亟趨赴如火
已然會城焦燬復陷俄頃猓獠交而於外芻糧先匱於內
孤軍千人屹逾巖牆 朝廷知公忠勇方擢連帥立任封
圻四顧方隅率歸塗炭輕身一試旋踵告危乃簡召湘人
拔其賢傑委以韜鈴置以腹心餐芋菽以當食肉被雨雪
而如挾纊大戰數十乃絕賊援環築堞塹以杜賊逸經營
二歲始復武昌旁發機牙迅除餘慝楚境三遭兵燹民氣
凋殘吏因爲姦不知紀極公謂不肅內政詎清外寇立去
不職者數十人登剡牘者數十人覈漕粟之溢正供者歲
減百餘萬釐稅賦之資軍餉者歲增數百萬昔之貧弱頓

爲強富旣肅吏政仍握戎機會兼圻大帥傾心相與乃鼓
各驍將圍潯江規皖北賊眾恒懼悉力上趨三載之間狡
逆再犯公皆躬自督戰以殲逋寇九江甫復卽丁母憂而
所部大將李公以猛進覆沒 詔起公墨經從軍公揮涕
首途張脊厲士壓境成營寇乃怵退蕞爾皖城久淪異類
重兵攻取再閱歲時悍賊鴟張動數十萬困獸思鬪反搤
我胷勢迫我疆勦軍幾卻公輒命將出於九天賊氣震懾
狂奔恐後乘勝得太潛桐舒四邑旋更日事鋒鏑不遑擇
甲賊偵我聞又拊我背黃城宵陷鄂堞晨驚固將迫吾後
揅以緩前圍公誠勿譁塹攻尤力獨將近卒返清楚疆賊
計垂窮皖城斯克積勞旣殷鞠躬遂志膺下之終不忘馬
革百身之贖莫輓駒流 國家節終之典旣極哀榮立祠
鄉里眾尤額手蓋公與兵事相爲終始其視友邦疾痛若

護支體九年之夏賊窺南境之虛突以鉅萬黠桀欵圍寶慶公間選將急救應時遁解是謂曲突於薪前櫻冠於室外扮鄉之祀曷其可怠祠後有魯肅之隄東有甘寧之壘勳烈畱貽千載相望後有覽者其視此矣乃爲銘曰

資水之陽麇起鳳翔聿生賢哲曜列旂常嶽嶽文忠肇毓仁里文聲霆震武節颯起粵凶肆虐江漢湮流合我湘徒猶雉虔劉緊公誠壹任材弗佚如垢斯澣如髮斯櫛屹屹全楚易危而安豈惟楚羣四國是翰功成恒化規吳不卒雲車往來終埽螭窟靈祠旣建俎粢孔周式昭來禩醇此釐卣

天寧寺重建禪堂記

粵自正法東來單提直指四諦同寂五宗斯作埽文字之顯迹標權實之微旨示錯錘於迅機恢眞覺於無量於是

廣關招提安處徒眾揮謝三有繫心一緣晏坐屏息刻香
程候又復動靜交養行止互策眞妄雙消能所並絕蓋以
尋丈之密室而繫廣眾之慧命此禪堂之制所由昉歟常
州天寧寺者負郡東郭翼然聳峙基廣百畝殿高十仞金
碧莊嚴之相構櫨宏麗之規玉墀藻井之觀琳宮邃宇之
勝固已甲於吳會美盡東南又代有名德宗規彌整拈花
證以無言擊竹契其深悟海內開敏之士有不來遊是邦
結制斯寺者輒以爲憾溯由唐代肇建迄於前明迭毀迭
興規制日敝 聖清膺錄象敎愈崇翠華載臨琳琅賁煥
則有大曉禪師振錫茲土爰究爰度高薨四接燥焉各新
始規後樓中室爲禪堂俾十方法侶六時參學其西爲影
堂東爲祖堂又東爲功行堂記前淵源後先繩步隙駒電
逝更越百年棟垣榱桷日就積壞縑素千百議將葺治雪

巖禪師法名悟潔楚北武昌人也慧鏡外韜智珠中澈住持斯寺已二十稔以爲祇林不整則清淨之法誰傳精舍未成則拔濟之蹤奚寄宜去舊易新弗局卑陋用是伐材於林取石於山徹後樓而重建焉凡成樓宇三十有六楹其崇五尋有奇增於前者十之一其背繚以周垣古木陰森虧蔽日月樓之上臧庋經籍左右爲寮宇若干楹寺僧獲深詣者居之樓以下規制各如其舊髣髴聖丹腹務極緻密復於殿左葺小觀音殿樓房六楹計工一萬七千有奇糜制錢六千數百緡經始於咸豐紀元之仲春落成於是歲仲冬是役也銖積擅護之施寸蓄伊蒲之羨權巖濟虛通力合事闋一寒暑而工竣從此入華嚴之會各證圓修升般若之筵盡通密義可謂彈指而樓閣現舒眸而戶牖闢者也受祺景行初地瞻禮梵天求寶筏而逡巡仰化城

而讚誦美如雲之傑構歎不日之易成敢託小文以告來
詰司事者爲都監師悟來監院師悟厚監修師潔蓮宜備
書

瀛環志略敘代

粵自兩儀奠位八極造基北辰縣象南維湊汐周髀設四
隕之喻鄒衍創九州之說固知高卑夔絕縱橫可度其環
周盈冲顯殊經緯易循其布祊然而洪荒悠遠甄索實難
禹貢紀要荒之域未擴實垠周官志職方之典僅賅中寓
其有探蹟殞紘搜奇沈墨則九都遼廓名詭山經十洲官
渺記儕郢說以爲定論殆未或然史氏代興殊方爰記條
支奄蔡傳埒大宛弱水流沙迹窮西域身毒啟疆於博望
大秦通譯於永元至若青羌丹粟之鄉縣度繩行之國六
朝以降載籍屢傳顧欲極亥章之步掌示而數恆沙探甲

乙之臧眉列而陳坤載稽之羣冊祗益惜如松龕中丞綜
貫百家淹通七略智絕輿圖之學識精形勢之言蓋自簪
筆西清以迄建牙南嶠已蘊五嶽於寸心鏡二垂於尺素
又以爲槃圖孟方乃宙合自然之理左舒右闢實造化無
窮之運將闢荒而燭遠必踐實以徵詳於是旁蒐四裔徧
求眾說爰有海西諸國用呈績事原其颿檣之所經測候
之所及約其圖徑參厥廣輪準望分率致爲精密譯其未
達制以爲圖並綴前言藉成信志效賈耽之畫能別華夷
誦倚相之篇遂兼工索方輿全體粲然備焉夫以大塊之
積元模之廣絕以窮荒阻以巨浸剛柔輕重旣殊其俗陰
陽燥溼復異其宜祝髮而裸氣炎以舒羈巾而裘風肅而
斂蹶張十萬伺星月之盈虛標擗三方極風霆之變厲託
廩君於白虎誓俟布於黃龍露紛而謁祇神焚頂而親梵

法襲屠耆之貴則鍛戟稱雄呈犁韃之琛則錐刀是競倣
詭情狀控扼爰艱要其盛衰迭代之效沿革遷流之故割
據并吞之勢禍福倚伏之形前後同軌古今一轍則觀伏
波之聚米善審機宜蕭相之披圖皆知隄塞有心斯世者
宜可深長思矣近世志外域者代不乏人然或咫尺見
鄙僊無徵浩引曲稱浮夸渺實舛東西之界奮鵬翮而稽
程誤轉注之方調鴉音而變響訛謬之襲有識爲譏中丞
獨埽舊言衷諸一是大之囊括四隅基置六合小之犀燭
品彙象圖神姦上之爲遠撫長駕攷鏡得失之資下之爲
殫識博通援核後先之本而余又與中丞共治海邦撫輯
彝夏有以見用志之密度物之明慎樞機於一室恢磅礴
於萬里者益如此也

右董子誥先生手編駢體文二卷竝詰弟方立先生文二卷都爲二冊授之梓人以受祺勗審義類命與校讎因得徧攬瑤琤博觀鴻祕陳思之說譏彈應時改定士衡之論文體嚴覈錙銖懼弗涵領神指探索淵微就所臆揆繫之帙後夫結繩寢化文辭肇宣圖方互旋奇偶迭應義量物以適志氣諧律以布聲志遠則有冲豫之神聲和斯有抗陸之節華實一揆若餘竝榮自晉以還放佚漸甚魁達有志之彥懲於駢偶之詞思標質以去文罇本而實未就其偏者亦皆違於自然激於亢厲又唯殺之響促數失中去此適彼詎爲得乎然歧轍旣分徑途鮮合指事意者放厥辭資詰辨者餘厥義至於彝典之製奏進之篇與夫緣情象物逐景繪聲則皆追琢以敷華絲邈以察類偶體之用致爲多焉要其純駁亦匪朝夕瑰奇奮鏘洪寥浩衍鐘球

在序凡玩非珍隋和置懷望氣知貴凡以誦法訓謨紹述
惇史舊者爲之則或鑒績牽引丹腹塗附其失也茶以鑑
承景形不能遁明燧燭物質不能奪也漫恂悅陵虛構象
緣情以暴采寓境以晰理或逞其譎罔究其實則將險迫
纖刻誕慢忘反其失也侂玄酒以設饗鸞刀以就割累重
以靳摯渾噩以存厚黜今之薄而惟古是抗輒踐其堂不
啻其蔽入其達言脫其輻其失也極他若曼麗窈巧妍說
微緻晨芩曜景夕霞鏡空春鳥自鳴秋蟬微魄大雅之士
翕然仿慕然或靡而不經蕩而鮮制譬之纂繡千純未足
以禦涼煥鄭衛二八不足以協宮商其失也倪四美旣肇
其敝因之近古明哲時與去就其有奄備盛詣芟盪雜累
神鋒穎解精識內涵雷電倚戶出幽入明河瀆順流浮天
夷嶽密緯竭於纖芒盛藻燦於黼黻鑄歐冶之劍飭五金

以成材叩無射之鐘和六氣以應律舍茲編也其誰與歸
蓋先生之學沈毅敏贍無所不窺就其一端可測全量而
詰弟所造則更窮極幻渺煥乎大成乾端坤倪不可爲象
鏤篆刻素具於此篇亦見駢偶之製淵源所歸未可與流
宕之韵鉤予之辭同類而稱述之也

族祖子定先生誄

歲旅重光月在大梁余叔祖子定先生示疾彌月奄歸冥
漠之鄉嗚呼哀哉輪移轂轉金石泐其精堅日薄星回蜩
蟪均其旦莫嚴霜秋集先枯鉞弋之枝朔氣晨寒卒隕卷
施之艸阮籍之窮途未迫孝章之隱戚終傷以是言悲曷
其有極況復士感知己愉惋得其深懷物樂同羣踴躍鳴
其故處服屬雖遠不殊附萼之親輦齒自高常從辟呬之
後茫茫歧路交愴星杳樂樂素冠同哀風樹此則恆河萬

劫莫能解其幽憂園則九重無以伸其呼籲者也條歸山
隴長閤音塵幼不誅長敢泥禮文謹綴詞於蕪筆幾紹德
於清芬其辭曰

南華衍緒東第分楣觥觥宗伯海內經師微言代闡累葉
承徽瑰姿擢穎訓行是期髫髻發蒙遺簾啟籍齊魯傳詩
孟何問易蟲刻微探駒陰分積列宿羅胸博風奮翮馳聲
黌序早在冠齡隋和皓質干莫新矧銳英屢辟元鑰終局
誰修於室而阻於庭皎皎激懷肫肫行誼孝始立身志先
承意喬幹凋陰莪編結泗蘄慰偏親壯遊停轡終鮮兄弟
爰有女嬃惟日子季中圭淑姝相攸韓虎箭野秦駒載延
甥館實啟童烏彊圉之秋護闈遘疾求艾三年禳祲七日
踏地何歸籲天無術癰骨自岫豐顙頓失吁嗟歲屨竟阻
龍蛇楚巫奚益秦緩誰支甫瞻陽谷遽迫崦嵫淒清總帳

虛寂靈旗嗚呼哀哉伊余末屬夙投神契角藝瑤壇繼經
寶笥十載離蹤彌年積思握手河干倏然喪次問胡顛顛
未耄而哀謂罹憂疾若不自知問胡清嗇不惠而夷謂宜
博本慈儉爲師憶昨嘉平邛江同楫陽侯煽威天吳逞疾
彼岸未臻予懷先惛曾是震驚營魂遽攝卽今春孟昕夕
載親思縈如幻慮起無因亦嘗警曉戒勿損神果爾臥疴
丁命不辰疾革之時走倅相召絮語諄諄宛然言笑晨露
欲晞夕暉猶曜維命是屯維行斯劭嗚呼哀哉有書五車
箕裘克守有田百畝饘飴能久四大永離誰爲我有恒化
順常待昌厥後嗚呼哀哉

侍姬柳氏壙志

侍姬柳氏河南固始人也名金巧笑宜人明眸善睐豐容
盛鬋顧影生姿近汝南之墟眞迷下蔡擬陳思之賦宛入

高唐年十五爲舅氏賂賣至楚吾友張君仲遠得之其輩
共五人並分爲婢媵姬獨以貌美侍仲遠戴凝仁啟橫涕
無從衾稠旣肅不猶實命會有他姬害其寵構陷之屏於
外室余時至鄂適見之詫其美麗仲遠卽舉以相貽脈脈
情深盈盈淚落甘從寵觚之列勿期金屋之妝蓋懲河東
之虐兼懷堂北之思直眷梓桑毋吟芣苢謂余秉性恬逸
必能遂其志也荏苒三年素心未易會寇警漸逼余罄室
避地彝陵去家則千里而遙論歲則及笄非遠鳩媒漸迫
幾偶傭奴厖吹橫侵將隨廝養余深惜之其事遂寢姬亦
重自悔也驚鴻旣返飛鳥依人感千金之誼則碧玉回身
誓一諾之盟則孟任剖臂時爲辛酉十一月矣余纏綿薄
恙時卻房帷陶寫中年不緣絲竹姬則奉匱沃盥獨伺陵
晨展簾徘徊不常當夕家有二姬實權正室敬之不替無

異女君言笑宴宴曾無謠詠之聲左辟提提時見婉怡之色悲歌激響竊下里而舒音刺繡成紋效鍼神而得譽後益視余動靜以爲悲愉七年求艾祝以延齡一飯加餐輒然見齒畫則形影相隨宵則夢魂欲附雖無五日之御實誓百年之懽乃浹歲未闌婉身遽告沈憂斯起如弗克勝撫按沈吟飯無一溢挑繁恫怳眠不終宵昏柳甫中月辰已屈勺飲之虛七日過車之痛浹旬有老嫗以杯水進者宛轉移時浮生遽實岑岑頭目乳醫之毒猶疑寂寂靈知娖娖之神奚告嗚呼惜哉姬賦質冲夷發言詳婉從容默解委曲多思或申旦拊心而粉悅之儀益靚或頻朝不食而笑頰之度無愆怒之而色彌和勞之而力無倦柔情自結如縛繭之無端清梵初月若未盡之未泊余旣以金經解其纏縛卽以其遺魄葬於益陽裴公亭之麓朝雲從南

服之遊當知解脫夜雨聽北邙之冢曷慰悲思癸亥年七月日誌

能懼思齋文

武進莊士敏仲求

福建行省重濬城河碑記

代

溝洫之利由來尙矣八閩都會形勝冠乎列州自晉嚴高築城濬河因其地勢西南隅引潮東北隅納諸山之水以備守禦以制災眚越今垂二千載代有濬治歷時稍久輒更湮塞前史所紀如唐韓勣宋曹穎叔程師孟趙忠定及明之謝贊江鐸熊尙文陳邦瞻諸賢咸可稱述而蔡忠惠之行水先廣疏渠浦以暢城河之源委遂使襟帶環抱萌庶暢然舟舶驩呼鱗次櫛比譬諸一人之身脈絡貫通營衛大適此邦之所以殷阜繇昌者豈不由此也與洪維我

朝子愛黎元大吏奉宣德意唯恐不及粵在康熙之歲濬城隍以及內河行省利賴者百餘載咸豐初元暨同治之四年皆濬而復塞四關之內同於行潦閼靈乖澤民大不便余來福州循覽四顧良用慨息紕於庫藏低徊迂久維城濠承西河委波以分布於四門西河之納不宏慮潮沙驟漲時或泛溢人力所致宜先西河以暨城濠而後郡治畚揭可次第舉也迺揆程經用仍其通而疏其壅請於制府以道員沈君廣揚領其事而遴幹吏爲之佐肇始洪山橋東南流環大鳳山迄於西水門凡二千三十五丈更治西水門外濠迄於南郭通新港之江流其在城以內者起西水門觀音橋之南逕東至古仙橋合水部門之水折而逾澳橋匯流達西水門而東北隅之水入湯水門西越楊橋至雙套橋匯觀音橋之支流出北水門又楊橋之別流

北注於達明河迴繞紫拂蔚鍾靈異長至今辰筮吉舉錡
築防截流俄頃告涸千夫雲集受署唯謹若迺衢巷逼仄
擔土無措則先淪南岸決隄納艇運致郊原用肥畎畝旋
又下遏更理北岸高下通理塗無怨咨役不逾時十旬而
畢爲費通七千三百緡有奇取諸海市贖鍰不糜正帑自
今以還茹溪納潮無溢無竭都市萬戶抱甕飲甘往跡四
郊商舶輻輳謳談疆畔懼溢行旅余與沈君秉上臺之成
算賴邦人之踴躍委任寮佐用底於成司權加謹於炎方
守吏驚精於隍塹未敢遠希忠惠或庶幾髣髴萬一焉若
夫通塞靡常前事可鑒因時宣洩益擴美利以俟後之君
子董斯役者某官某某等應附書

重建杭州海神廟碑銘并敘代

環大地之外而號爲百谷王者非海乎朝潮夕汐宜莫不

有神焉以憑之浙濱海凡六郡而杭據浙西上游尤當其衝其繫於民生利病甚鉅故報享之典特隆水經注言浙江潮水晝夜再來月晦及望尤大蓋洪流入江東以島嶼其勢激而愈怒時復有颶風鼓盪之偶一汎濫刷河決防下游田廬胥受之害自錢氏立國以來累有興築而法制未備洪維我朝下武嗣興厪念民閒疾苦廟堂旰食至特遣懿戚重臣置理其事雍正八年敕於海寧州治廟祀護國寧民顯佑浙海之神而以伍公錢王諸神配享廟址故廣四十餘畝門廡殿陛閎麗視王居其聖製碑文暨列朝所頒聯額官司視護唯謹歲時祝號祭式備致誠敬粵匪之亂隄身洞決鹹水灌注河內飲者苦之病稼尤甚杭會規復之次年初議障海因遺址而壘之干夫邪許慎選木石歲糜白金數十萬今大工將次第告蒞矣

某時時巡視海濱瞻仰故廟石柱碑亭僅存餘都燬廢念
捍禦雖由人力而呵護實賴神靈報享之典曷可稍緩爰
疏聞於 朝求復往制得 旨俞允則鳩工庀材檄某官
某某等董其役越二年而告竣凡費緡四萬五千有奇雖
限於物力規制稍遜於舊而正殿配殿東之天后宮西之
水仙閣咸具靈爽之所依託士庶之所瞻仰於是乎在夫
人情樂利旣久幾忘締造之艱劬及身被其患農田浸壞
不治一旦去斥鹵而樂豐稔長隄翼然餘糧棲畝遂以爲
有司之事當爾豈知工無久而不壞善行水者量度緩急
必使人易爲可因而後創制之以垂後世然則今日之海
靈効順謂非 列聖規模之遠足以懷柔百神而烏能致
此哉某職在守土與神共有捍禦之責者也旣幸觀斯廟
落成更疏請 頒賜 御書殿額以妥侑神以爲民祈福

敢拜手稽首泐石紀事而繫之以銘銘曰

茫茫禹迹巡方以杭海濱廣斥青徐暨揚物任自然有激
斯怒龕赭橫絕急湍西注淖潏雷奔礎穴騰嶺農桑遠徙
奚啻萬頃鉅防疑疑百川遂東闕宮巍然神廟其衷神之
來思螭龍翔舞神之栖止天吳不侮海門鞏固 帝錫嘉
名奉天明威以肅百靈亦越百年薨棟荆棘南天澄宇神
明有赫神奠民居民復神宅建章比隆有司所籍嗚呼神
兮長福我民風雨大和報以絲綸祀事孔修吉蠲圭幣樹
茲穹碣告千萬世

移華圖贊

壬午丈蓮伯先生山居奉母恂恂色養遠追漢廷萬石近
比浦江鄭氏弟舅白首怡然成圖眞詣所蘊風勵澆薄繪
事方竟奉太夫人諱有無窮之哀焉其危坐竹窗者年丈

也季氏幼勤攜鉏柱竹石間叔氏藹臣手一卷露坐引手
西指若示之鉏所者仲氏庸吾倚松凝竚邈然以思洗腆
之愿既違同氣之情尤篤於是年家子莊士敏爲之贊曰
烏反哺思母劬免四乳見白須靈之邈相隨呼仁義腴山
澤靡宦者達隱者儒五十年色怡愉或出處各一隅霜露
降歲月徂履阡陌喟長吁萃形肖如相娛松竹徑交荒蕪
長相守意不孤詠脊令念將雛莫遠離眎茲圖
榕陰日課敘

夫政事文學迹象殊而源流則一山林廊廟旨趣異而功
用維均時代有沿革運會有常變五德代嬗而中庸平易
之道尙焉炎漢迄今百家紛錯其言近旨遠目擊道存區
畫名物經緯禮俗則申鑒中說實爲權輿若乃承敝易變
法後王而易行因時措宜踵前車而必墮必高譚邃古或

名美而實非必墨守師承或世殊而事闕 聖清膺錄制
作恢宏二三勝國遺老深感天人之故綢繆取法之效抒
蘊寫抱副在名山二百年間眞儒輩出禮堂寫定之本萬
流仰爲山鼎元亭解剝之篇六際歸其縉橐有能精一家
言守一師說已足霑溉並世津逕來茲顧求其博學詳說
甄古剴今返荀楊於大醇掩房杜之偏勝者或罕覩焉新
城楊鍊傭先生學成道通洞經綜史鞭辟入裏醞釀無滓
臧經緯於不試樂優游於大東郵致一編問敘溝壑受而
讀之蓋咸豐丁巳之歲日課所得都爲十卷自南雷亭林
諸家著述暨于近代靡不殫精討論參之時政同異推擴
利益補綴罅漏期于粹美無疵必可行於世而後已善乎
哉中庸平易之極軌也夫康成之攻何氏疑或近名知幾
之著內篇不無過激意有偏注弊亦隨之若斯之貫徹始

終窮究通變洵今代之金鑑前喆之諍友載籍有靈許以
論世昔賢可作嘉其起予者焉二十年來鉛槧未輟意悵
所造繼此當或許窺乎先生方砥柱蠻貊笙簧蓬島擁書
萬卷借巢一枝攬滄洲之千山邇裨海之一葦招贊普而
折簡革飛鷄以食葚渺渺東瀛何當溯洄從之相與證晰
疑義也哉

國朝常州駢體文錄卷第二十九目

聽雲僊館文十四首

陽湖湯成彥秋史

擬王子安九成宮東臺山池賦

并敘

七夕賦

菊粦賦

西師告成勒碑太學頌

并敘代

海外鴻泥集敘

潘小江詩存敘

強忠烈公遺墨題辭敘

史幹甫二尹雲深處印存敘

擬庾子山謝滕王集敘啟

敕贈修職郎君選劉先生家傳

代

陝西候補知縣唐君妻錢孺人誄

并敘

强萼圖先生淑配杜恭人誄并敘

祭倉聖文

代

祭管孝逸大令文

國朝常州駢體文錄卷第二十九目

國朝常州駢體文錄卷第二十九

聽雲僊館文

陽湖湯成彥秋史

擬王子安九成宮東臺山池賦

并敘

九成宮東臺結勝遐曠背巖枕流爾其飛瀑瀉空檐牙隱
樹喧寂萬狀煙林四圍侍郎張公涉覽明瑟遂崇締構因
庫蓄渚卽高作巖危亭補樓飛入屏障隋壁插漢通於谿
橋山翠落於晨杯急湍鳴於曉簾雖縣流百步而蓬瀛宛
在人間削石一拳而華岳起於方寸僕昕夕多暇侍奉履
綦忝爲梓澤之游聊作小山之敘云爾

爾其地接金臺路臨綺陌月館飛甍銅街列戟艸礙步而
縈青絮搖風而點白金碧徒誇煙霞未闕無曲沼之增波
少仇池之片石雖鄰仁壽之宮未稱羅含之宅乃翦艸萊

疊嶂崔巍割雲映之一朵覺林壑之全開移藤挂壁剔石
穿苔姓虹忽現野鶴都猜樹何時而綺合鸞滿目而霞堆
非巨靈之可擘豈愚叟之移來然而峰可棲緩池雖浮鷺
有叢桂之畱人乏春流之繞屋遂傍增巒疏泉一匊溪小
於杯風輕泛穀源噴珍珠被湔縣瀑雲近水而景浮岸連
山而岫複溪聲從巖腹而飛來煙樹共風颿而低簇加以
傑閣回廊古柏新篁危闌則一曲二曲垂柳則千行萬行
窗低貯月漱遠流觴補甘蕉而聽雨植荷芰而延涼籬編
蟹舍樹綴鷺房誰巢晨架鷺港潛藏夜雨過而羣峰盡綠
巖鸞落而一水皆香春障兮探雲秋唐兮盪漿消夏兮山
翠晨飛泛雪兮人舡夜響招朋舊之兩三鱗煙雲於指掌
放鶴間亭叉魚斲網蛤吠空階鹿迎藤杖落松子於繩牀
逗泉光於書幌深復深兮山外山樂莫樂兮濠上想一觴

一詠宜雨宜姓有松景竹景多蛩聲雁聲長橋短橋兮紆
曲彎圓藥園兮縱橫穿林屐響逐水舟行苔濃步滑荇觸
颿輕聽松風而神爽鑑潭景而心清明月欲墮素醪獨傾
琴歌一疊枯茶一杵指煙蘿而共語與鷗鷺而偕盟奚必
遠遠夫城市方可脫略平簪纓

七夕賦

於時大火西流高風送秋蓮渚波冷桐軒露浮施藻帳兮
采駐闌雲扇兮路脩弄機杼以終日眷靈匹以無儔至如
百子池頭九光燈畔相憐相愛綵縷交繁楚舞楚歌餘豔
欲斷巡濛汜之素雲貽美人之錦段窺朱鳥以臨窗駕班
龍而蹀漢若乃枝連丹木翼比青鸞夏瑤簪於霧縠戢瓊
佩於雲嶠信長生之密誓聆私語以何嫌絲萬條兮縷縷
鍼九孔以纖纖敗雕匳而對鏡倚畫樓而卷簾若夫永巷

淒其長門太息聽吟蛩以有懷撲流螢而無力含遙情其
未申拾墜歡而空憶耿明河以微波棄團扇而拂拭怨秋
夜之何長悵款顏之難卽至乃青鳥回翔赤龍騰躍調絃
領之瑤笙叶夷則之金鐸參武丁之仙道祈福壽於沖漠
服箱詠琬彼牽牛飛蓋駕雕陵馴雉槎桑博望以沈浮石
跼支機而嵯嶠及夫才人染翰名士言情託雙星之贈荅
望一水以淺清弄玉吹簫而歡讌絲鸞寫韻以要盟鏘袪
服之環佩踐秋諾於玉京或有蘭閨望遠桂苑驚秋錦絨
蘇蕙書上馬周隔音塵於榆塞誦奇文於柳州臨煙渚而
上溯歎河廣之無舟撫鳴琴而作操引清醪以長謳歌日
脈脈不語遙相望聘錢十萬今宵償月眉星靨催新妝陵
波羅韞生輝光又歌日苦恨年年作嫁衣蘭宮芝館擁星
妃離情更向殘更續灑淚還看弄錦機雅歌甫終月墮空

碧傳笑語於瓊階徹瓜果於綺席期良會以經年罄歡悰
於芳夕更何心於送巧爲塵世而役役

菊粦賦

薦素商而標爽兮懷予美兮蕭晨月含輝而晃朗兮雲澂
霽以無塵說斯艸之珍瑋兮茹素抱而欲申越山川之莽
賈兮曠抑志而愴神矢安隱而貞壹兮勵晚節於寒香慕
中央之正色兮叶坤吉於黃裳絢奇采於山椒兮挺峻節
於崇岡屏籬落而獨處兮視朱門若蓬戶儼叢桂於小山
兮采芙蓉於江蓠初蘭佩以同心兮資葉施而奚取覲朝
陽而布葉兮矯夕儀而斂陰託秋霜而表榮兮倚曾墀而
效心扇淒淒之涼飄兮獨專專兮沈沈遂初服而敢化兮
恐冉弱兮弗任憂心怒其如擣兮爰息景乎茅茨申木瓜
之永好兮感魂夢以要之意悅悅而失所兮醉芳醪而傾

厄訂歲寒於三徑今期克保乎令儀澹相忘其無言兮恨
秋夜之不但聊援翰以寫心兮許子懷之惓惓

西師告成勒碑太學頌

朱學使觀風江左代莊阮珊文學沒家作

臣聞七緯麗天參虎耀金精之宿五兵利用機槍埽絕域
之氛故會稽玉帛誅後至者防風丹浦戎師緩前禽者就
日以至軒后承靈肩髀誌蚩尤之冢周王膺錄靈雷服獵
狄之師莫不振弧矢以威九州廓雲霓以靖六服所以岱
峰玉策稽文化於百神魯殿金絲告武成於前聖方之今
日靡得而言焉欽惟

皇帝陛下天樞高挈地絡宏包員靈陳九圍之圖泰媪賚
十華之券含齒戴髮六合奉天子之尊方體圓顙一統成
聖人之業動扶極而歸雲隙豈惟千八百國而遙運參旗
而憲斗鈴已出二十八宿之外故三靈祗若六宇謳歌慈

杵糴絮盡候月而歸琛湏醑溟蠡俱占風而納費金輪布
日鯉魚清假期邸之災玉弩垂危凶水無九嬰之沴豈有未
革狼心仍懷豕突封狐逞志自投一面之羅毒虺挺災竟
肆九頭之虐者哉乃有逆回張格爾者浮竹餘種沈木爨
芽軀又生罷梟將爲鏡性同槃駱通巴焚而未能習其犬
搖比夜郎而自大脫身荒徼甘自絕於天彝負命窮蹶屢
有干於國憲蓋自我

高宗純皇帝之平定回部也廟略覃敷已掃潢池於絕塞
皇威遠振先誅叛黨於巨酋鐵額銅頭竟貫橐街之斧鑕
窮奇檣杪未封武觀之鯨鯢寬其萬死之誅宥以再生之
德銅街拓土呼韓刑白馬之盟鐵券延恩荒外訂黃龍之
約是則白環效貢未足酬誠丹關施仁詎云望報乃不思
北面懷音西隅息喘榮假分符列甘涼之六郡心同向日

格干羽於兩階洗兵瀚海永消風雨之災刷馬天山長斷
煙溪之警竟欲包藏禍心圖謀反噬幸鞭長之不及恃地
險以爲雄氣雜金行背朱隄而結黨山鄰陰磧橫赤標以
疏疆振螳螂之臂距轍當輪萃蚊蚋之羣彌山滿谷蠻爭
觸關千里雲屯蜩集遙飛一呼霧合以致雲臺上將幾殞
岑彭麟閣勳臣敢殲來款自謂投荒之餘孽可貸誅夷薦
食之封豕足違聲教豈知禹功敷土四溟無倒海之波羿
母迴輮大地絕反風之艸於是

皇上天怒斯張元謨廣運法文昌而簡武臣御平臺而授
方略庀水衡於太府鳩佼票於羽林楊威大將軍長齡實
總元戎特膺閭寄授節鉞於江淮不必伏波四將贊天威
於吳蔡斷推裴度一人由是天戈所指箕張翼舒皇旅啟
行星流電激蓋聖人之德除暴救民王者之師有征無戰

遂駐旂雪領取道烏孫陵崆峒騰轂薛黃公遁甲能全萬
勝之師玄女兵符克通九變之策加以五部雄才三河丁
壯九攻按律一鼓先登神兵七萃雲連蹕騎之營鐵騎萬
羣雪滿駒駝之殿先聲雷動羽檄星馳周勃之出漢營疑
從天落劉鄩之入黃澤飛出地中贛盾一戟西北分兩道
之師龍麗十重聲勢動九天而上況以黨項爲前導深知
吐谷之謀假北韃爲疑兵直抵焉耆之域黑山四百三之
部落俱聞鐵馬之嘶朔方十八萬之旌旂盡是王師之氣
戈鋌雪色獵貅之甲隊齊來騏驎風嘶鵝鵲之軍聲盡壯
斯時也

天子方議禮蒿宮攷圖芝殿知幾則哲惟斷乃成螭杖宵
呈乙夜之銅籤仍警虎符晝遞五申之異命頻頒豈非文
武兼資智勇天錫者乎厥後三帥謀成大師效命九折叱

崇巖之馭三更裏蜀道之懸齊長璫之攻突厥齊唱蘭陵
狄襄武之奪崑崙時當元夜況乎上契天心克來神助風
雲集涿鹿之師煙塵布地雷雨助昆陽之戰屋瓦飛空狂
飈煽赤壁之舟海水待蒙哥之渡同茲奇捷實藉明威遂
乃銅丸內潰崑岡之沙礫俱焚鐵弩斜飛金水之波瀾盡
沸偏師直擣萬馬際聲數武庫之兵未遺一矢計鬼方之
克不待三年蛟矛未拔洞脇穿胸銀鵠先奔夷山殄谷雄
虺授首山空罔象之災妖鳥縣頭夜落訓狐之魄亦其自
取度劉適足償其罪戾矣時也天威震警禁旅駢羅南辨
傳歌東鞮獻舞檻車執訊露版宣威鵬鵠回輪楊柳壯面
關之色熊羆轉隊旌旗豔榆塞之春從此營開萬里新標
定遠之名壘築三城盡是受降之地豈特碣石銘功燕然
拓境鏤穹碑於碎葉建鐵柱於滇池所可同日語哉

皇帝於是坐明堂而錫賚御紫殿而受俘翠輦遙臨勞條
侯於細柳乘輿親降問耿弇於臨淄黃鉞行威武庫漆月
氏之首青邱解酈組纓正貳負之誅而且龜紐錫五等之
封龍袞煥上公之服畫鄂褒之冠劔竝列陵煙著徭霍之
勳名俱開帶礪赫赫乎秉一人之慶而揚萬里之威者矣
且夫先宅六合大業也澤浸七部鴻德也逆回就縛束頸
象闕偉功也樹銘鐫勳潤色騰冊昌數也我

國家

列聖相承重熙累洽開天竺之圖鑄鴻文於壁水闢金川
之域鏤鳥跡於橋門鋪以金聲聽雲韶之樂釐以石鼓紀
岐阜之勛固已形容盛偉藻被工歌今

皇上誕敷文德有此武功承

列聖之宏謨廓

皇朝之休業道宗至聖威同兩觀之誅功企尼峰共振中
天之鐸四門洞啟循石柱以虹申七聖駢駟植寶碣而雲
時紅闌曲護陋石字於胥居碧琬同環鄙蟄趺於姚雋大
毫濡染叶元音於清廟明堂大筆淋漓嘴古製於韓碑梯
雖陳師鞠旅質成謀於先聖先師治定功成勒豐碑於東
膠東序臣幸列青衿恩叨食餼歷階無自企景奚從肩摩
孔卓之牆目極帝臨之宇敬竭涓埃尚慚朱鷺繞歌之作
導揚乾則聊附白狼檠木之餘謹拜手而獻頌曰

於鑠

聖清奄有區宇雲時受釐蒼符紀祐交趾南綏金川西撫
禹疆軌屬肅慎貢弩黃芽所入盡歸卽敘蠢茲西陲歷世
濟慝負險窮邊敢肆猖獗白羽蝨飛烏櫓望絕堂堂賈復
殲我邦傑邊檄告警赫怒斯張選將簡帥皇威遠揚戴戴

將軍虎矯龍驤

天子命我於彼西疆隆衝蕩蕩旆旆旒旒中央取道流沙遂超
哈密青海混茫天山辟兀雷厲風行雲馳電激洗洗王旅
所向莫敵時維除夕塞外煙昏雲旗慘淡天馬嘶鳴圍城
大捷淝水神兵三軍氣壯邊塞威行百道梯攻五兵圍合
離庫成羣呼韓盡囂困穴鼠窮煙巢狐突天罰已彰渠魁
斯得龍堆以北大漠以西鑿車險勢積甲山齊羣回震懾
恭聆鼓鼙澂清萬里野無逆黎露布奏捷上達九重策勳
飲至大典聿隆肆類上帝禋祀

列宗告功用圭介福攸同賊酋獻馘禹吾就縛揭竿徧告
羣醜允服恩光下逮酬庸詔祿策以雄藩圖之麟閣茂茲
駁烈登三成五展幣上庠釋菜東魯天章炳曜雲軒鳳舉
紀迹穹宮勒銘校序維清緝熙毓武孕文典高响嘒美燁

皇墳昌黎吉甫稽首揚芬於萬斯年長此嶙峋

海外鴻泥集敘

我

國家龍興大東虎視遼左敷文軫而通象譯覃聲教以啟
鴻濛納畫獻琛跨嶽越海問扶餘之舊俗賴峴峯高采箕
子之遺風玄菟郡古一時陪臣之奉使京華恪修職貢者
類能屹揚風雅結契名流丹青翰墨之林漸被有截舟楫
文章之府寢澤無垠隆古以來未有若斯之盛也吾友雲
生太守藻摘南國詩緝東音清詞玉映駿譽滿乎長安好
語珠穿鴻文傳乎異域王辰癸巳閒與朝鮮使臣徐帶方
士淳竹垞眉宿李復秀瀼西雲衡南窗堯章對山更唱迭
和送抱推衿飛騎傳詩地鏗讀畫篇什投贈簡書往還迺
輯成編置諸行笥取坡公詩語名之曰海外鴻泥集蓋以

誌蹤跡之合離氣誼之沈摯也乙卯冬薄游嘉州太守過
余行館出示曩集亟徵弁言余綜厥篇章覽其體製雕龍
炙轂神州眩鄒衍之談熏鼠射魚虞衡異益公之志匯百
川於鯁壑煽颯則其際其瀾測一勺之蠡波望洋而幾難
爲水洵足穠秣塵垢超視藝林矣夫恆閑之士鄉曲之儒
舉足不出里閭持論不踰繩墨爲道朱蒙之奇詭每瞠目
而觀爲述平壤之高華輒擗舌不下又烏能泛浮槎於星
宿拂釣竿於珊瑚聽成連弦外之音究子瞻華臧之旨哉
今太守獨於簿書之暇更參香火之緣點檢蟬編重尋鴻
爪證禪心於泥絮悟往事於風篁漆園吏有言六合之外
存而不論六合之內論而不議是焉知有道之世守在海
外之盛軌邪太守之編次是集也其紀纂之微意排比之
苦心初非以矜聲氣誇結納著益簪之廣侈贈縞之遐也

特以致拳拳於舊雨表泱泱之大風昭我

聖清輶軒之遠文教之隆也他日者付諸削氏流示遠人
徵求友之印須校郡齋之定本溫子昇寒山片石宜登七
寶之牀白太傅長慶新詩行重千金之價以俟作者不其
偉與效敬禮之潤色予病未能丐士安之敘言蒙竊自任
遂不辭而爲之敘

潘小江詩存敘

浣篲叟曰文章憎命達六一居士曰詩窮然後工自古唯
殺之音半緣屯蹇之遇是以阮籍慮禍詠懷而託孤鴻趙
壹疾邪陵詞而賦窮鳥江潭悽愴撫移柳以成團旅舍飄
零感病梨之菸色嚴霰零而華林先隕青霞鬱而修夜不
暘以是而思伊其戚已儀徵潘君小江古之傷心士也少
戾孤童夙抱瑋志奉范喬之祖硯啟晏子之楹書三都頌

自鰲辰一經解於黌序精研鼎說廣集師資時注劍潭司
馬作江鄉之祭酒延英俊於里門君既列門牆益闢奧窔
挹深情於桃萼潭側問奇字於紅杏壇前耶壑滌其虛衿
詠歌抒其逸致粲深茫拱圓護重帷艸長鶯飛囊韜碎錦
顧乃鵬運搏日鴻息漸磐哭遼海之西風愴秣陵之落葉
天馬蹶足驚駘呈材越施效瞶碩人減色謂君苗當焚筆
研論李蔡原屬下中好惡之辟是皆然矣升沈之數豈有
馮與君乃跌宕詞場棲遲隋苑浮白瓊粦之觀踏青玉鉤
之斜茱萸灣口停畫舫而冶春豆蔻梢頭擘銀箏而度曲
波平雁齒橋臥新紅淚灑羊曇軒間晚翠寄大雷之簡小
妹詩清訪焦麓之州徵君居近西園載酒時登斗野之亭
東閣延賓婁下陳蕃之榻放黿潮落鐵甕城高射雉場開
辟疆園古流連光景自寫其性情感憤談嘲必衷於風雅

以方作者何多讓焉爾其自嗟奇數復罹屯災王哀廢其
蓼莪原思飮夫藜藿氣沈雄而安託瓊瓊頻年心佗憐以
何之頭顱老大時無劉表漫爲王粲之依人論廢魯衰早
悟孔方之絕我驅車徑去彈鋏悲來恬車下之薪勞甘道
旁之李苦振策青徐之野擊楫淮泗之濱譜華錄於嶽臺
碧紗籠句載桂旗於洛汭翠羽凝愁過函谷跨牛之墟尋
灞岸騎驢之跡岷峨迢遞秋風度大散之關汧渭回旋宿
霧暗衰斜之谷千重雪棧涼逼衣單四面雲林條欺巾墊
荒巖蛇曲五丁破斧之山古樹鵲唳十鼠磨牙之穴誰能
遣此我亦何堪洵足望遠生嗟回腸動魄已泊乎卸裝梅
市弛擔琴潭蠟屐少陵之堂壁牋薛濤之井武侯祠畔老
柏森森文君壚邊新醅醺醺信錦城之云樂忘來日之大
難公卿倒屣以爭迎廚及傾榼而送抱江東矯矯識郗孟

之清才鄴下翩翩重元瑜之書記郵筒蒟醬紀風土於賸
賓井鉞參旗纂星經於甘石何難擘江山之勝概作風月
之主持平然而曼容曠矣升斗之供自量公理超矣參佐
之職不辭君一返江關載遊京雒神雅社鼓弔故壘之蕭
蕭遠雁明駝望平沙之莽莽飄同京口病閒廣陵之濤裊
展漣沱句挾幽井之氣遂觀光於上國爰注籍於中銓桓
公短簿仍是吳蒙蠻府新詩更繙蜀志由此倏遲道路歷
落舟車雨噴蛟涎半溼袷袖雲傷馬首時亞鞭絲瑟瑟荻
芰夢逐潯陽之水萋萋芳艸春歸鸚鵡之州洞簫倚而蘇
子歌殘錦瑟鼓而湘妃怨切竹王祠外擘幽奇於犵鳥蠻
鸞神女峯頭隱諷諭於朝雲暮雨莫不播之哀唱緯以妍
詞逮至手版隨人頭銜涵子低眉而察大吏折腰而謁督
郵龍性能馴聽鼓而勉循令甲雉莚足戀銜孟而祇益酸

辛試登熱惱之名場舞爛鸚鵡難作清涼之居士隱慕蜘蛛黔婁傷百事之乖拔釵按篋邠老索重陽之句敗興催租久避債之無臺藉長生之有庫卽負高達夫之瑋抱捶楚猶虞除是梅子眞之勝情塵埃方謝人皆爲君深慨而君不顧也夫以君之才詣期君之位業映發篇章超軼儕俗抗瓊瑋而製佩編珠笈以縫裳是宜列之蓬島之班置之陳芳之國何乃淪茲末秩辱在泥塗哀樂感於中年志士潛然隕涕危苦出於蕉萃幽人慙焉墜心鳴之不平者至矣年之不永者亦由此矣而況羈畱幕府閱歷邊塵顛顛自傷抑塞難遣君顧飽黃羊之饌謁青兕之裘過隗囂之宮傲同谷之作塞雕盤雪酒酌蒲桃宛馬嘶風芻肥苜犢長河岸曲尋紫邏而人遙弱水流分寄翠駕而路迴亦復魂銷角語心碎笳愁濡不律以言情訴無慘而寫恨索

居深念腸九回而不知積感成痼魂十逝而徒往恆榦七
尺遽返本眞浮生百齡頓成大覺抱沈憂而入地錦里方
旋搔華髮而問天玉棺竟下寒蟬淒咽猶曳悲音鷺鳥哀
鳴冀畱勁翮唱付秋墳之鬼碧化三年喚回春夢之婆紅
噉一霎披斯集者不啻過黃公之壚聆山陽之笛焉余與
君同調江表未接音塵泊爲蜀游獲睹閎製吾友張子瑞
之君之素交也與君門下士李孝廉稼門將校君詩付諸
削氏王孫遺集收從藩溷投餘昭諫名章得自紹威偷後
山邱華屋寢門之風義猶存斗酒隻雞曹公之戲言如昨
獨珍片羽手錄成編爲乞敘言以貽來哲余旣悲君之遇
又樂觀瑞之之苦心稼門之高誼殆將相與有成也爰爲
第其先後推厥本原義有引伸故擇而尤雅理有裁制故
和而不流先發明其大凡庶不乖其指趣淑儷鄭夫人小

蘋詩埭集尾蛩鷄比景笙磬同音睹芳茗於紅鑪情緣綺
靡采柔桑於紫陌藻思纏絲字訂文簫早叶鍾陵之韻詞
傳漱玉曾商金石之編工比興而偏妍振哀吟而未已憶
亾琴之靜好古壁凝塵仰老屋以沈思嗚蟲空蠹鳴呼遺
音淒楚君眞絕調之冬郎小敘闡揚我亦離愁之秋士
強忠烈公遺墨題辭敘

神河九曲異人毓秀之區龍門千仞光岳鍾靈之所繫古
詎儒魁壘先具歲寒之姿峻節峭嶸必流金石之響韓城
強忠烈公眞其人矣公舉嘉慶戊辰進士綰符中州致命
滑邑癸酉之難見知者變色間知者改容以爲晉之卞渚
陰唐之顏常山得公鼎峙後賢罕儔也沒後二十餘年公
仲子萼圃刺史掇拾煨燹求公遺墨得李公論一篇家書
三則徧徵題詠茵蒨竹帛排比成書壽諸削氏以余備知

公之生平屬爲弁言簡端曰公黃珍夙通玄理獨貫規曾
史薰白之節服慶建慈謹之訓逮事三世懋延重暉守夏
侯之昌言補陽平之逸簡玉色思柔則就養粲粲銀手如
斷則服勤理理雞人始號管遶之佩已飭蠡漏初下橋衡
之奉必虔至如譽振鰲鰲推梨讓棗調齏堽机集蓼茹荼
大山小山共衽裾之雅道南道北無差池之嫌事耶嫂而
肅具衣冠撫弱弟而愛均衾被此公之馴行也幼挺純至
長標崖岸道通菰優枕經屏史農祥硯夫晨正則牛角挂
書圓景匿於西隅則螢囊照字荷樵深谷常忍飢而誦經
陳篋中庭輒持竿而漂麥奧索孔鄭而心折於一字之師
氣陵曾王而舌捫於萬夫之辯廣川之舍三年未窺任城
之業百日不輟此公之詰學也尹公弟子咸號端人東海
學徒竝矜氣節前後設教里中垂數十年問字而至踵接

軒墀請業以前摯郤雁鷺著書盈架閉戶若忘歲時立說
專家質疑幾穿戶限擁丹鉛之席而目以之矜標甲乙之
籤而指爲之繭教授成市英雋仰其風規通德號門儕輩
奉爲祭酒此公之教術也若夫非公不至雅慕東魯澹臺
贈賻力辭慮非南州芻東添薪然葉斧冰作糜梁伯鸞減
竈更炊不因入熱申屠蟠因樹爲屋行與子還謝仲叔之
豬肝滌史雲之魚釜艱窘之狀人不能堪此公之苦志也
世之爲牧令者大率奉行故事無誤簿書詎知深體治原
講求教養公蜚英杏苑布政棠郊儲未陰徹土之謀籌曲
突徙薪之策乃姦徒惑蚩氓之聽犀照方然而憎俗流魔
社之殃狠心遽逞公結纓禦寇撫劍登門防螳聚之兵獸
挺麋集拒豕突之卒蠡擁直前遂乃絕慮無遷投被奮往
抒懷長嘯呼南八爲男兒染翰賦詩喜臧洪之同日玄黃

關野豕婦殞於衛戈刀雨灑空墓賓甘夫白刃

九重聖主涕隕而咨嗟四海薦紳心欽其義烈賞延後嗣
功著史成此公之大節也昔者中丞苦戰高樓起橫笛之
聲太尉長圍晉陽發扶風之詠正氣之歌激越柴市歸貞
吟嘯之集悲涼林煖嘯晝其節概震鑠乎宙合其翰墨流
敵於古今揮毫而星漢昭回屬橐而鬼神飲泣時值天荒
地老齋恨無窮運當劫盡灰飛遺文不沒蓋惟公有至絜
之行至勤之學至博之教發爲至偉之節著爲至奇之文
焉迄於今臧血久碧墓艸再陳覩閭製而流連取名章而
往復不啻須眉森竦聲欬遙聆宜乎萼圖之導揚先美珍
此手澤進而播爲聲詩被諸金石也乃竊取公羊子之義
書其後日於忠烈公見忠臣之至於萼圖見孝子之至嗚
呼懷隨武子之德我欲觀於九京勒表忠觀之碑義無慙

於一字如徒以文辭而已則公固不待文辭而顯諸君子之題辭亦不藉敘傳鄙人之敘雖不作可也

史餘甫二尹雲深處印存敘

繫夫蘭亭紙角押認葫蘆薤葉刀尖珍同骨董麝灑朱礬之印芸帙生香燈明鸞乳之囿落牋凍綠姜夔集古王兌標奇由來尙已同里史君餘甫今之魁奇士也訪古繇餘行吟楚澤諧孟莘老夢華之錄緝屈靈均采若之辭出其緒餘芻及執事九千說文之字辨其孳生十五史籀之篇證其同異趨趨遶施岐陽之石鼓曾摹箇箇呌呌身毒之梵書重譯銘毫合律鐵筆生鉞暇日出所作雲深處印存見示陵紙怪發觸目采騰儼神明於鍊滓激音通意象於鑠塵畫水三體八體掌錄能劬朱文白文心寫其暢擢露垂之穎潤徧雲根行風運之斤鍤開山骨意匠雖詭詭精能

則同若印從泥如絲在隻玩夫波磔鉤貫知其曾有鑪錘
觀其筆陳縱橫知其手有控縱於庠塾已僕曉無一孔學
失咫間窺窺刺之石不能正其體拓盃鬲之器不能舉其
文今得榦甫不吝匠心獨標縣解斯冰對語如讀秦漢以
上之書竹素無功共商筆墨難施之技祭酒常侍校定本
藉作功臣三橋雪漁諸老輩資爲後勁豈非道藝相成之
高義琢磨交助之佳士乎瀏覽數四爰書數語於簡首而
歸之

擬庾子山謝滕王集敘啟

聲振牛鐸發揚之氣宣風韻流鳳箭搏拊之音協律爾其
芳華似駛不改妍於故姿峻湍乘焱不遷流於曩瀆吐言
天拔絳雲霞於玉樓寄情淵深張錦繡於瓊管殿下挺生
結匠爲世宗工汲冢遺編暗識三篋魯宮藏篆日覽萬言

牽秋芙於江波明璫製佩孕仙蛾於南粵珠襖縫裳索胡
繩之纚纚都梁不能斂其芳羅皇墳之贊贊芝房不能掩
其雅優鳳揚采軒翥九苞宗駒擅名卓犖羣雅於焉飛走
文翰吐喻芳粦一篇跳出鴻律賦乎幄賓九變樂成龍文
歎乎家相信韁材膚受矣出機杼兼以蜉蝣身世兵火驚
心螻蛄春秋滄桑寄慨遂至玉杯珠柱盡墮塵沙緇帙縹
囊半歸展畫比年患苦羈縻牢愁煎迫枯樹戰雨衰柳搖
風每多噍殺之辭實有飄零之感用是行吟憔悴接踵屈
子登樓佗僚繼體伸宣情懷無俚槩可知矣憂患芥其神
喪亂逼其氣非有陳畱之激賞詎識爨桐不遇扶風之縣
解何取亭竹况復散佚之後掇拾所餘幾於書林墜簡立
文覆瓿過蒙聖慈遠賜采擇覩白鷺之羽深而塵容施青
松之枝垂蔭弱艸等部婁於泰岱撮壤形卑納芥子於須

彌戴山知重獎借所被喻東風之變枯惠澤所覃方膏雨
之養瘠故知風流宏獎芬芳入懷月旦品題珠玉耀采荷
孫陽之顧盼頓教冀野羣空施郢匠之斧斤差幸散材價
重轉瞬灰飛六瑱密室溫回瑞紀五雲崇臺陽至伏願聖
躬與時納豫善人得位常作歲星我澤如春寓諸綠素伏
遲展觀詎期求章就道侍鄒枚之客館竊欲瞻望令儀仰
鎬洛之宗盟謹當先陳尺簡鴻羽戾天魚書傳浦修啟陳
謝無任屏營

敕贈修職郎君選劉先生家傳代

同里劉君選先生既沒之三年令子莖自蜀郵書幣走京
師謁芾爲傳先生芾從大母之兄也事父母竭誠敬處兄
弟無間言敦信乎朋友施仁於戚族不有君子斯焉取斯
刑於寡妻孝乎惟孝乃施未獲報天不假年太史無由舉

其辭司徒不能興其行竊恐老成凋謝終於簡牒就湮芾
蓋涵覽舊聞旁觀載籍以爲古之積德於當躬顯名於後
世者皆有列傳以彪素微自東方厭次至夏統已一百十
人所以襄志乘之缺遺備史官之采擇焉爰甄其遺事而
爲之傳曰先生諱萬銓字君選姓劉氏系出唐詩人檢校
禮部尚書禹錫之後先世由彭城徙陝西之涇陽遂世爲
涇陽人元都觀裏久栽千樹之桃清渭渡頭時覽萬竿之
竹曾祖諱龍田祖諱瀛隱德潛輝里鄧推重考諱楚慶自
秦遷蜀行誼爲同輩矜式稱公茂先生先生其次子也自
其幼時卽有成人之度公茂君及母楊太孺人皆鍾愛之
學有定程業無息版聽雞人之唱握竿持籌焚雁足之膏
發書陳篋優游六藝佃獵百家絕意嬉游究心篇翰鬱深
落世園隔江都之帷艸長鶯飛囊絛希範之錦造詣頓進

聲譽赫然公茂君以雩潭小築近市畏晏子之塵梅市移
家卜居端詹尹之策願依仁里買宅戎州七嶺峰高芳鄰
費千萬之值雙江水遠故關懷百二之雄酒攜陶令之廬
徑開黃鞠衣染固言之汁巷指青楊先生承彼高閥播厥
芳懿續咸秦之舊業讀計然之新書躡屣擔簦伯氏憩滇
池而服賈量鹽操米仲子代家督而習勤旋鰭鳳卜之占
彌肅雞鳴之鹽治榛栗之摯宜室宜家調萱堇之羹問安
問寢逮至公茂君咎徵集鵬歲歲識在蛇先生嘗藥晨鑪腸
九回而如涓禱神夜席燭雙然而不輝屬續遽賦夫大招
寢苦不勝其哀毀楊太孺人復靡笄慘臆傷瑱悽膺中美
疾於膏肓致臥病於牀蓐先生含越王之馘潞石建之裘
侍疾類乎黔婁剖股感乎閨臺迹其至行通於神明者與
旣而禮讀亞廬詩刪岷岷駭浪頽岸無一泓之停波同飗

動枝絕半晷之靜景先生綜理家棣敬事伯兄尙齒推逾
艾之尊遠行慮采蕭之感時飭衣帽於隔牖用勸息輟於
長途榜衢刊棠棣之碑機雲比屋肄業叶壘簾之奏聽兩
聯牀他若阿買阿宜束修豐授經之挈若昭若憲遣嫁割
附郭之腴且徵卵翼之勤無間手足之愛外至通財而銀
盃羽化君子則可欺以方假資而金穴遽空仁者則願處
乎過馮驩魚鉞非以市恩召南鼠牙不聞速訟此又先生
友于之肫摯而責人之從薄也方謂陽和抱德恬漠求愉
履道守玄晚姓可恃乃微疾忽攫飾巾奄化道光二十五
年九月考終牖下春秋六十配王氏婦德具備子塋從九
品銜將贈先生如其官卽乞芾爲傳者也女三人皆適士
族孫一人定江赴閩遠邇嗟悼寢門之哭若應耶許曰斯
人早亡無爲善矣星次已回連追車就墓以二十六年三月

卜葬於慶符縣南岸之原感舊茹酸愴懷曷已芾與先生
有連且昔同里間追念葭莩之萬幾想像粉粹之規儀造
端設指取譬無方稱孝稱弟乃足比其門風得箕得鉤乃
足方其貨殖太邱道廣乃足寫其胸衿彥方順和乃足表
其素履金矢息競乃足驗其平矜懔陰忘機乃足徵其容
物於虛隨武子之德言觀九京郭有道之碑不慙一字鄉
賢豈無崇祀之文載筆實維舊史之責撮其芳軌略箸於
篇

陝西候補知縣唐君妻錢孺人誄

并敘

玄默紀年斗維建丑吾友唐君溥淵元配錢孺人以疾卒
於長安行館年僅三十有七嗚呼哀哉青門息軫金徽之
響方調丹谷沈雲瑤琨之音遽寂溥淵悼失明淑思章景
徽越一載癸丑成彥因事游關中以喪來赴且日君昔年

與余有同悼爲文必有至者乃徵誄言以表芳躅成彥不
獲辭孺人諱玉英字晚蘭一字靜僊國子監生慶均長女
也殷商舊史吳越王孫陌上看琴唱緩緩春歸之曲盤中
餐昔詠杲杲日出之篇一蘭未徵孤星先曜如玉之璞質
而不華喻蕙之芬幽而不豔宜其嬌愛損此清衷孺人則
少秉禮規動遵內則守惠班之女誠工令嫺之藻文晞澤
簪髮謝金翠之耀軀習勤女功學締繡而紉指桃林競華
靡追乎游譙蜺膏照夜罔閒乎織維有令德焉有臺教焉
歲丙申歸於溥淵雖夕牽絲雞晨奉盥爲閨中之良友標
林下之素風朗玉照乎嫵嫵塞淵播於嫺邨唐固名臣裔
孫食不重珍衣卻紉縠少江陵千樹之橘無成都八百之
桑飛蟬脫鬢常入券而輸租饑雀窺倉恨求粟之易罄傷
哉貧也靡識勞矣旣而詞譜甘州車停潤水遠隨宦轍言

依堦鄉適溥淵尊人時軒先生開文舉之筵置鄭莊之驛
衙齋話舊長者之韉常投官閣畱賓信陵之友廬集孺人
衣麤食淡操作不遑宵成尺布以待解推晝輟半餐藉儲
饋問故雖縣魚漑釜飼鶴分糧得佳婦之彌縫初不知宜
況之情也泊乎先生金滿移輶溥淵復黔中作宰詠臺砢
於山上薄采蘼蕪潔脩臚於堂前載虔榛栗乃命生磨竭
自墮地而已然葉抱寒蟬至隕霜而方已蓋自浦淵赴官
未逾年而時軒先生卒未幾尊慈魏孺人又卒濯日叢木
染血淚而俱枯摩霄靈禽間泣聲而畢集玉闕風冷方招
西極之魂金筑星弄遙雪南天之涕斜日黯黯聲聆趙女
之悲愁雲離離慟甚唐衢之哭倚杵試問圓靈曷其穹穹
巨壑可填渤澥仍其浩浩毀可滅性憂能殲身此又其遭
遇之不偶也無何而臺符婁下詎許時聞積穀蟲飛官道

蝟集焚田文之舊券金穴皆空啟柳氏之錦囊銀栢羽化孺人則應機俄頃指畫裕如無兒女囁嚅之態都護歎其賢明止同官悉索之心胥吏服其敏洩卓見偉抱識者稱之然而際此憂虞更遭抑鬱連環結恨鹿盧在腸桐入爨而先焦月沈波而莫挽貞疾萌芽已基於此矣逮至靈輿遄反下澤言旋相夫子以慎終爲尊嫜而卜兆不采青囊之記允符赤霄之占豈馮松檜以求祥幾信山川而能語題珉馬道卒安歐氏之阡負土鹿門遂定龐公之冢今夫賢達之槩每難得之閨闈終窶之傷必先起於中壘今溥淵雖裝餘片石篋少兼金而得此賢儷以徜徉林泉優游家術則寢邱一畝可負楚國之恆薪老屋數廬尙勝會稽之賃廡登樓寫韻沽春拔釵門臨蠡水之煙波家擅陶園之風月破涕爲笑二人同心雖簪紱之榮曷足易此茲者

鳬舄遙驚魚軒同竦將見蓮峯撫瑟清調叩缶之聲蓉鏡
開匳朗歎虛堂之景御繭絲而示儉襄錦製以宣猷闔房
良助亦一時所鈔觀也豈知孺人茹荼集蓼積瘁有年玉
棺婁下悲天屬之摧殘楚舄宵亡檢翠匳而如洗衰親告
逝陟岵之痛方深嬌女頻傷碎珠之情曷尉盪餘生於一
昔藥豈能靈招骨肉於九原魂今有待鄉關繫念時諄語
夫家人泉水思歸尙頻呼乎阿嬈飢冷而舜華碎藥夢妖
而瓊瑰盈懷時溥淵方奉檄金州借籌戎幕夙敦愛玩之
志偏慳設別之緣無菊醴之延年奠椒漿而酹地此則春
蠶體蛻尙畱一綫之絲精衛形離猶抱重淵之恨未化望
夫之后素志彌堅已升忉利之天舊恩常在以是言哀哀
可知已嗚呼洞溪涵澍先瘞霜鐘之響秋蓬焰起遂傷蘭
露之心春曦易沈秋艸同脆明鑑無少停之景雪泥絕再

來之蹤臨樊姬之館擁髻何人展徐淑之詞遺縑在笥溥
淵休沐甫乞悲來填膺爰睇歸廬聿求故劍誦庾蘭成傷
心之賦掌上龍摧述潘黃門哀逝之文琴邊鶴怨景堂開
而夢入總帳啟而魂來以余訂交梓曰雅託葭莩授我金
荃輝茲彤管嗟乎僕本恨人驚心蒙楚之什君悼逝者愴
懷薤露之歌敬謨哀辭用植崇槩乃爲之誄曰

結璘誕珍昭華散芬弄珠濯月舞鬟梳雲森森菱湖激波
一曲篤生邦媛玉穎荃馥珩璫其度黼紉其身凝采髻歲
賁章笄辰五組粲明七襄錦織珊瑚架臨晨涼琴援夕早習
箴縷侍養陔蘭絜餐馨膳彌得親歡愛敬諸母循禮靡越
提攜弱弟推梨讓栗作嬪晉昌淑慎益章阼階簪代婉婉
高堂英英夫子明德達人嘉耦曰妃相敬如賓高閣琴深
疏簾月皎闌倚碧城窗開朱鳥釵頭賭茗銓下分牋爭疏

栗事笑避茶煙翠被憎寒銀貌薰透眉史初修衣香互覆
圓碁畫紙得句裁筒唇沾淡墨衫襟春風翦韭炊梁牽蘿
補屋舉案諸鴻輓車卽鹿君舅綰綬於彼伊涼從姑遠適
玄胤承筐起居寢門貞吉中饋言默已喻志承克敷食獨
諳性適鹹調辛衣獨安煥委佩垂紳載遷單桓道經戈壁
毳幕鐙紅平沙雁白廝渠淩雨緯未占星簽名鸚鵡注籍
藤廳夫子思親京華反轍隨牒黔山州司敦迫凝眸屹雨
揮手蠻煙深箐駐馬苦竹聞鵲冥冥經緯安安鎮靜綜理
閨幕代奉溫清昊天不弔迭邁閔凶舅沒姑逝遽愴考終
鶴赴遙傳魚緘未達王事羈遲雞斯將發倉人代匱臺使
催租女子之勇逾平丈夫據理直爭分絲析縷瘁羽曉音
卒禦外侮家書久滯婁盼郵程空囊試檢扶櫬遄行邂逅
邊陲涕零如雨詩刪蓼莪何恃何怙言歸江國言植松楸

佳城墨食樂哉斯耶蓮萼幕中金華道上旅殯舟凝秋墳
鬼唱椿雲失蔭蕙閣深悲睠懷鶴髮遠隔鸞帷從宦入關
相依形景樹艸忘憂戲茗合穎僉謂良匹共此百年青鵲
竝命涼蟾永圓孤火遙驚狼蟲未息飛輓需才戎旂籌筆
出門惘惘絮語千端何圖射虎竟兆離鸞玄宮靡誰璇閨
譽歇邁此沈痾華莞奄忽丹蜨餘粉紫鳳遺雛葯鑪日對
病榻長扶翠袖天寒脂盞塵沒替豈蠲勞龍眞出骨瑤田
反節霓旌昇靈尺幅雲駛千行淚零詎謂遠行長辭畫閣
落雩離柯秋燕違幕緒疎之婦患難之交蟲飛鏡冷蛛網
絲拋煙艸凝蕪風篁淒韻弔鶴銜悲哀鴻斷陳嗟我唐君
傷同子荆蛸漏夜永蘭釭焰明熒熒兒女麻衣如雪行者
已矣藐爾三尺結想盈野尙寐無叱零愁積川恨隨逝波
虛帷無言沈魄不起鄰雞一聲鐘景空綺魯酒已薄蜀砵

徒哀朗月不至憂心橫來嗚呼哀哉疇昔同居宛其入室
及今戢影尋夢無迹杜曲韋曲長亭短亭蘭陵道遠江上
峯青燐火宵紅溪楊春碧聽鐘蕭寺休神幽宅驂鸞入月
杳不可期圖芬鐘萬徵此素辭嗚呼哀哉

強萼園先生淑配杜恭人誄

并敘

同治三年九月己亥朔韓城強萼園先生淑配杜恭人卒
於成都行館春秋六十有五嗚呼哀哉喬林振綱叢篠秋
華常儀戢霸蛾英夜寒不有壽珉曷章煒策恭人生自儒
族來嬪忠門敦說憲章動循萬制秉箴言於婉婉表淑範
於瑤琨自夫結縭逮於屬纊有嘉德無違言所天敬之門
內化之婉協娉嬃嘻嗚不作蒞蘭佩脫隨宗嬪而餘濯嚴
裝蒞藻蘋繁效季女之絜齋戒事既而

睿皇帝敍教忠之典垂延賞之恩先生得入承明進參著

作渥邀槐檢瀑直薇垣恭人線續鍼紉聽雞鳴而操魚鑰
振璆佩玉當蠶月而執桑條每當代置之辰益見相莊之
樂菜根齧得命縛欄之獠奴茅屋補餘遺賣珠之侍婢洎
平先生出宦蜀都歷典劇郡叱馭峻坂總屯金川恭人製
蔣欽之纛被縫晏嬰之敝裘惠問宣於六嫔深仁播於帷
幙井鉞參旗之野寒暑均調鄆筒茹醬之鄉鉤翰無忤室
靡垂珥庭有縣緜儉可成廉仁能溥惠冊載同餐鶴奉

四朝疊拜

鸞章化成列國之夫人典重命卿之內子固宜翼乃高致
範茲上型若夫嚮子斯勤進賢以禮葛藟綏其福履鴈鳩
結其平心俾婉孌而勝子望庶孽之繩蟄曾聞仁者宜享
大年胡遽沈痾遽徵妖夢丹失九轉之效醫窮三世之門
喪高柔之賢妻敘孫楚之哀慟古今同喟可得而記也成

彥鳳規盛儀冀表貞素悼泉室之終閔就旗旒而綴辭以
塞先生故劍之悲以慰哀子聖室之痛乃爲之誄曰

在昔范史軼於固遷中圭之行特著於篇仁能獲壽義必
有甄旣炳載籍豈殊後先猗與恭人岐公鼎胄河曲鍾英
龍門毓秀絜符瑄華芳扇蘭臭訓稟女師譽播姻媾簡賢
依德作配循良兌貞叶繇嫺緯含光杖屨祗事帚箕肅將
溫溫常克離離鳴鏘勛哉夫子名題黃紙書習上清彤珥
瑤妃火熱藜青詩吟薇紫共輓鹿車賃居槐市東方索米
薄宦稱貧有無黽勉鍊指生皴設醴宴客典釵畱賓循資
乞外偕辭鳳閣郡佐益州耽征原隰馬首雲生蛾眉壁立
行水舉裳浹渠戴笠同閑三農豫籌家給綰符四郡作牧
二州魚軒古驛鵠艦芳洲織催蛩砌旦戒雞籌榮屏華臚
化洽歌謳東坡種粍西澗種柳敬輿之居樂天之叟求衣

視夜戴星瞻斗錦製襄猷如左右手仁麻咸煦慈澤旁濡
願成偕隱跡託寄廬組攜灌圃轍守縣車一麾出守三徑
嵒初方謂百年永休愉說何圖上圖不佑穎哲美疾潛滋
愁眉暗結沈絲牀第氣苦若噎鬱潭夜雨蓉沼晨霜寶瑟
弦絕銀釭燄涼蒿晞露液薜駛日光灰清瑤管淚紫修篁
嗚呼哀哉扶風女宗京兆閨憲異代同榮方斯再見家傾
慈蔭天奪令善婢媼失聲嫠嫠悼歎曩駐鸞軒并珈委佗
今顰象服悽愴蒿歌漢盤泣露隴水停波藻彫玉井榆落
銀河曲臺傳經中壘著刪矧茲芳躅是訓是式長恨焉窮
徽音能卽千載圖芳煒我竹箒嗚呼哀哉

祭倉聖文

代

祭不欲疏德無弗報殷薦苾芬敬祈神勞粵稽上古民性
狂獫結繩出治懷葛道滄河洛效靈庖犧有作一晝天開

九疇文錯惟聖繼起輔翼軒皇眺彼鳥迹爰箸龍章書契
肇興紀綱咸備方策播芬質文永世夏后宛委探厥嶙峋
周官太史掌達書名燕許鴻裁禁林典冊馬班鉅製名山
付託牒載年祀訊執山川咸賴文字辭因筆宣歷代相沿
閭左所習下至府胥筆札仰給諧聲會意矩折規旋如泥
從印如陶就甄皇哉

聖清戴筐擯朗地耀其文天垂其象吾儕小吏曷敢舞文
案牘允積簿領糾紛荷聖之休從公不忒玉律金科各適
其職粦潭之曲錦城之隅恪陳椒醕謹治櫻廚清風灑然
陟降庭止燦爛雲書綴我繇祉載揚明德敬述謏聞莘莘
俎豆庶式清芬

祭管孝侯大令文

嗚呼夏侯奕世而傳易彪固纂史而名家守青箱之故業

燦文囿之奇葩矧以君之才行將歟歷乎勳華何貞疾之
久困豈酬善之或差風蕭蕭而易暝日慘慘而欲斜長物
僅存夫蝨簡負薪孰閔夫童牙悼良吏之不永輟相杵而
歌些嗚呼大令馳譽暑年侍大父於京國固已博覽夫陳
編逮奉親而歸里更肆力於雕鐫年少氣盛陵厲無前破
產結客囊無一錢劉毅則一擲百萬焦遂則辯驚四筵杜
牧揚州之夢仲宣鄴下之篇目無餘子望蔚羣仙且百困
而置驛宵飛蓋而傳牋視青紫如拾芥躡初枕而趾顛迫
入貲而作宰已投筆而喟然自占博雅之才或見絀於鎮
撫惟君才識之兼優卽以詞華爲治諧筆旣擅夫雕龍政
更傳夫渡虎剖波同乎次公慈祥稱乎召父童騎竹而歡
迎棠作舍而陰補袁安冬日之歌陳寶嚴霜之語洵寬猛
之交施允上考而擢舉統歷湖與魚峴皆去思而來舞忽

美疾之遽嬰官未酬夫才請憾借寇之無因念畱焦之獨
苦一葉輕裝言歸故鄉宿逋山積三徑艸荒曳淵明之杖
開讀雪之堂鑿齒既枯夫半體摩詰卧病於山莊整傳家
之白帽踞折腳之藜牀平泉之鵲木星散翟公之賓客淪
以魚生塵甌鶴少晨蜚猶復縱橫文海跌宕詞場伴鬢絲
於禪榻理藥裹與茶鎗檢平生之著述擇名山而善臧遇
春秋之佳日尙扶輿而徜徉歎遺民之飲德走百里而負
糧冀病軀之常時作魯國之靈光慘龍蛇之尺歲竟歸魂
於北邙嗚呼大令修德可恃而不可恃也君固三世而垂
名侍御潛曜於中道司馬戢翼於平生倘否極而必泰宜
丕振平家聲何迴旋於末秩又沈疴之久攫書未成夫封
禪銘已列乎素旌穉子乍離夫文葆孤孀泣掩夫寒檠遽
休神於修夜諒抱憾於九京痛凋年於管輅觸思舊於蘭

成落沒仲容之徑棋寒謝傳之枰聞鄰笛而哀感過黃墟
而淚傾駕素車與白馬言觴酒而劍羹細知交於疇昔庶
昭鑒夫夙誠嗚呼哀哉尙饗